



LAPORAN RINGKAS STATUS CUACA PANAS

AGensi PENGURUSAN BENCANA NEGARA, JABATAN PERDANA MENTERI (NADMA, JPM)

<https://portalbencana.nadma.gov.my> | Hotline NDCC : 03-8064 2400

18 JUN 2024

1/3

TUJUAN

- Laporan ringkas ini bertujuan untuk memaklumkan mengenai status semasa cuaca panas, kesan serta tindakan-tindakan yang telah diambil.

RAMALAN CUACA 7 HARI (SEHINGGA 24 JUN 2024)

- Monsun Barat Daya (MBD) telah bermula pada **17 Mei 2024** dan akan berterusan sehingga September 2024. Semasa MBD, lazimnya angin bertiup secara konsisten dari arah barat daya dengan kelembapan udara yang lebih rendah dan keadaan atmosfera yang lebih stabil. Ini menyebabkan kurangnya pembentukan awan hujan yang membawa kepada taburan hujan yang lebih rendah dalam tempoh berkenaan. Sehubungan itu, kebanyakan tempat di seluruh negara akan mengalami bilangan hari tanpa hujan lebih banyak berbanding bilangan hari hujan.
- Secara amnya, rantau negara menerima tiupan angin Barat/Barat Daya sepanjang tempoh ramalan. Kelajuan angin di Lautan India, Laut Andaman dan Teluk Siam boleh mencecah sehingga 70 km/j manakala di Laut China Selatan pula boleh mencecah sehingga 50 km/j sepanjang tempoh ramalan.
- Pengaruh angin baratan dijangka berpotensi bagi pembentukan garis badai pada awal pagi dan boleh membawa hujan lebat beserta angin kencang di pantai barat Semenanjung Malaysia, utara Sarawak dan barat Sabah. Kejadian ribut petir dijangka berlaku pada sebelah petang dan boleh berlarutan hingga ke malam terutamanya di kawasan pedalaman dan pantai timur Semenanjung Malaysia, barat dan pedalaman Sabah serta Sarawak sepanjang tempoh ramalan.


Sumber : Jabatan Meteorologi Malaysia (MET Malaysia)

STATUS CUACA PANAS

- Pada **11 Jun 2024**, terdapat **1 daerah di Semenanjung** dan **1 daerah di Sarawak** mencatatkan cuaca panas tahap 1 (berjaga-jaga) dengan suhu maksimum harian 35°C hingga 37°C sekurang-kurangnya 3 hari berturut-turut, manakala terdapat **1 daerah di Semenanjung** dan **1 daerah di Sarawak** mencatatkan cuaca panas tahap 1 pada **12 Jun 2024**. Seterusnya pada **13 Jun 2024**, terdapat **7 daerah di Semenanjung** dan **1 daerah di Sarawak** mencatatkan cuaca panas tahap 1.

- Pada **14 Jun 2024**, terdapat **8 daerah di Semenanjung** dan **1 daerah di Sarawak** mencatatkan cuaca panas tahap 1, manakala terdapat **1 daerah di Semenanjung** dan **1 daerah di Sarawak** mencatatkan cuaca panas tahap 1 pada **15 Jun 2024**. Seterusnya pada **16 Jun 2024**, hanya **1 daerah di Sarawak** mencatatkan cuaca panas tahap 1.
- Untuk rujukan, tahap 1 (berjaga-jaga: suhu maksimum harian 35°C hingga 37°C sekurang-kurangnya 3 hari berturut-turut), tahap 2 (gelombang haba: suhu maksimum harian melebihi 37°C hingga 40°C sekurang-kurangnya 3 hari berturut-turut) dan tahap 3 (gelombang haba ekstrem: suhu maksimum harian melebihi 40°C sekurang-kurangnya 3 hari berturut-turut).

Sumber : Jabatan Meteorologi Malaysia (MET Malaysia)



STORAN EMPANGAN

- Sehingga **17 Jun 2024**, terdapat **dua (2) empangan** yang menunjukkan penyusutan baki stok simpanan semasa air mentah dan berada pada paras BAHAYA, iaitu **Empangan Muda di Kedah (23.76 peratus)** dan **Empangan Bukit Merah di Perak (29.90 peratus)**.
- Manakala **empat (4) empangan** lain menunjukkan baki stok simpanan semasa air mentah berada pada paras AMARAN, iaitu:
 - Empangan Malut di Kedah (31.10 peratus);**
 - Empangan Teluk Bahang di Pulau Pinang (43.20 peratus);**
 - Empangan Timah Tasoh di Perlis (44.73 peratus);** dan
 - Empangan Pedu di Kedah (55.50 peratus).**
- Untuk rujukan, baki storan **29.99 peratus** dan ke bawah (BAHAYA), **30 peratus hingga 59.99 peratus (AMARAN)** serta **60 peratus dan ke atas (NORMAL)**.

Sumber: Suruhanjaya Perkhidmatan Air Negara (SPAN)



LAPORAN RINGKAS STATUS CUACA PANAS

AGANSI PENGURUSAN BENCANA NEGARA, JABATAN PERDANA MENTERI (NADMA, JPM)

<https://portalbencana.nadma.gov.my> | Hotline NDCC : 03-8064 2400

18 JUN 2024

2/3



STATUS PENCEMARAN UDARA

- Pada **12 sehingga 18 Jun 2024**, terdapat **lima (5)** kawasan yang merekodkan kualiti udara yang tidak sihat dengan bacaan API seperti berikut:
 - ✓ W.P Kuala Lumpur (Cheras) – 116
 - ✓ Perak (Tanjung Malim) – 114
 - ✓ Kedah (Alor Setar) – 103
 - ✓ Terengganu (Kuala Dungun) – 155
 - ✓ Melaka (Bukit Rambai) – 115
- Untuk rujukan, bacaan API 0-50 (baik), 51-100 (sederhana), 101-200 (tidak sihat), 201-300 (amat tidak sihat) dan melebihi 300 (merbahaya).

Sumber : Jabatan Alam Sekitar (JAS)



RINGKASAN PENYAKIT BERKAITAN CUACA PANAS

- Pemantauan sehingga **15 Jun 2024** mendapati jumlah kes kumulatif bagi penyakit berkaitan cuaca panas **meningkat kepada 102 kes (berbanding 96 kes pada 10 Jun 2024)** dengan pecahan kes mengikut diagnosis adalah **23 kes strok haba, 72 kes kelesuan haba dan tujuh (7) kes kejang haba**.
- Bilangan keseluruhan kes berkaitan cuaca panas mengikut negeri adalah 18 kes di Kedah, 17 kes di Terengganu, 14 kes di Johor, 14 kes di Pahang, 11 kes di Perak, lapan (8) kes di Selangor, enam (6) kes di Negeri Sembilan, enam (6) kes di Sabah, empat (4) kes di Kelantan, dua (2) kes di Perlis, satu (1) kes di Pulau Pinang dan satu (1) kes di WP Kuala Lumpur. Pecahan kes mengikut umur adalah 79 dewasa, 18 remaja, tiga (3) kanak-kanak dan dua (2) warga emas.

- Satu (1) kes kematian baru** akibat strok haba dilaporkan pada **13 Jun 2024** melibatkan seorang lelaki dewasa berusia 22 tahun di WP Kuala Lumpur dan menjadikan kes kematian akibat strok haba **meningkat kepada lima (5) kes**. Empat (4) kes kematian terdahulu melibatkan seorang lelaki dewasa berusia 22 tahun pada **2 Februari 2024** di Pahang, seorang kanak-kanak lelaki berusia tiga (3) tahun pada **1 April 2024** di Kelantan, seorang lelaki dewasa berusia 25 tahun pada **22 April 2024** di Negeri Sembilan dan seorang lelaki dewasa berusia 31 tahun pada **4 Jun 2024** di Perak.
- Tiada kes yang dirawat di hospital pada masa ini. Semua kes lain telah mendapat rawatan dan sembuh.

Sumber: Kementerian Kesihatan Malaysia (KKM)



LANGKAH-LANGKAH KESIAPSIAGAAN OLEH AGENSI KERAJAAN

- Pada **14 Mei 2024** YAB Timbalan Perdana Menteri telah mempengerusikan **Mesyuarat Jawatankuasa Pengurusan Bencana Pusat (JPBP) Bil.1/2024** yang turut dihadiri oleh YB Setiausaha-Setiausaha Kerajaan Negeri selaku Pengerusi Jawatankuasa Pengurusan Bencana Negeri (JPBN), Agensi-agensi Teknikal serta Agensi-agensi Tindak Balas. NADMA merupakan urus setia mesyuarat. Fokus utama mesyuarat adalah untuk membincangkan persiapan pelbagai agensi untuk menghadapi Monsun Barat Daya (MBD) yang dijangka akan membawa cuaca yang lebih kering dan kebanyakan negeri akan mengalami lebih banyak bilangan hari tanpa hujan. JPBN telah diminta untuk mengambil langkah yang sewajarnya untuk bersama-sama menghadapi situasi ini dengan meminta pengendali air untuk meningkatkan kecekapan operasi mereka serta menyediakan sokongan logistik untuk memobilisasi bekalan air ke kawasan terjejas.
- Agensi Pengurusan Bencana Negara (NADMA) telah mengadakan mesyuarat penyelarasan bersama pelbagai agensi pada **15 Februari 2024** bagi memperkasakan kesiapsiagaan untuk menangani impak fenomena cuaca panas dan kering semasa peralihan Monsun Timur Laut (MTL).
- Operasi Pembenihan Awan (OPA)** telah dilaksanakan pada **27- 28 Februari 2024** berdasarkan permohonan Kerajaan Negeri Pulau Pinang yang menyasarkan kawasan sekitar Empangan Teluk Bahang dan Air Itam di Pulau Pinang dan Empangan Bukit Merah di Perak.



LAPORAN RINGKAS STATUS CUACA PANAS

AGANSI PENGURUSAN BENCANA NEGARA, JABATAN PERDANA MENTERI (NADMA, JPM)

<https://portalbencana.nadma.gov.my> | Hotline NDCC : 03-8064 2400

18 JUN 2024

3/3

- OPA di kawasan yang terjejas akibat kemarau di Sabah telah dilaksanakan pada **28 sehingga 30 Mac 2024** dengan kerjasama NADMA, Kerajaan Negeri Sabah, Jabatan Meteorologi Malaysia (METMalaysia) dan Tentera Udara Diraja Malaysia (TUDM). OPA di Sabah ini merupakan langkah untuk mengurangkan kesan kemarau dan juga kekurangan air melibatkan beberapa kawasan di **Papar, Lahad Datu** dan **Tawau**.
- Pada **10 Jun 2024**, pihak NADMA telah mengadakan Mesyuarat Penyelarasan OPA Negeri Kelantan bersama Kementerian Pertanian dan Keterjaminan Makanan (KPKM), Pejabat SUK Kelantan, MET Malaysia, TUDM, Lembaga Kemajuan Pertanian Kemubu (KADA) dan JPS. Mesyuarat bersetuju diadakan OPA bagi negeri Kelantan pada **21 sehingga 23 Jun 2024** bagi kawasan Hulu Sungai Kelantan. OPA akan diteruskan dari semasa ke semasa berdasarkan keperluan.
- Jabatan Bomba dan Penyelamat Malaysia (JBPM) akan memberi tumpuan terhadap lebih **652 kawasan titik panas** kebakaran di seluruh negara susulan fasa akhir Monsun Timur Laut. Selangor, Johor dan Sarawak merupakan antara negeri tertinggi yang direkodkan berlaku pengulangan insiden melibatkan kebakaran kategori lalang, kebun, hutan dan pelupusan sampah.
- **Kementerian Pendidikan Malaysia (KPM)** pada **19 Mac 2024** telah meminta Jabatan Pendidikan Negeri (JPN), Pejabat Pendidikan Daerah (PPD) dan semua institusi pendidikan bawah KPM untuk melaksanakan langkah-langkah seperti berikut :
 - i. menangguhkan semua aktiviti luar bilik darjah jika cuaca terlalu panas;
 - ii. memantau aktiviti yang boleh mendedahkan murid kepada keadaan cuaca panas bagi memastikan kesihatan mereka tidak terjejas;
 - iii. memastikan bekalan air minuman bersih mencukupi di institusi pendidikan bawah KPM dan menggalakkan murid membawa air minuman sendiri bagi yang tidak berpuasa/murid bukan Islam;
 - iv. menasihati dan menggalakkan murid mengambil air minuman dalam kuantiti yang sesuai bagi mengawal suhu badan;
 - v. membekalkan air minuman kepada murid asrama sekiranya keadaan kritikal dan tiada sumber lain bagi mendapatkan air minuman; dan
 - vi. sentiasa berwaspada serta bekerjasama dengan klinik dan hospital berdekatan sekiranya berlaku sebarang komplikasi ke atas murid akibat cuaca panas.

Sumber: Kementerian Pendidikan Malaysia (KPM)

- Pusat Kawalan Bencana Negara (NDCC) yang beroperasi 24 jam setiap hari akan sentiasa memantau situasi cuaca. Amaran bencana akan disalurkan kepada Agensi Tindak Balas dan Pegawai Daerah dari semasa ke semasa.



NASIHAT DAN INFO SELANJUTNYA

Tips Sewaktu Musim Panas:

- ✓ Minum air mencukupi.
- ✓ Hadkan aktiviti luar.
- ✓ Pakai pakaian yang selesa, sesuai dan mudah menyerap peluh.
- ✓ Elakkan pembakaran terbuka.
- ✓ Menyimpan bekalan air secukupnya.

Untuk maklumat lanjut, sila layari

<https://portalbencana.nadma.gov.my> dan <https://www.nadma.gov.my>